

Kapisilinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut Inatsisaanni nr. 18, 31. oktober 1996-imeersumi, § 5, § 8, § 10, § 10a, imm. 1, § 13, imm. 2, § 23, § 25, § 26, § 33, imm. 2 aamma § 34, imm. 3, ilaatigut Inatsisartut inatsisaanni nr. 6, 20. maj 1998-imeersukkut, Inatsisartut inatsisaanni nr. 5, 21. maj 2002-meersukkut, Inatsisartut inatsisaanni nr. 28, 18. december 2003-meersukkut, Inatsisartut Inatsisaanni nr. 17, 3. december 2009-meersukkut, Inatsisartut Inatsisaanni nr. 12, 3. december 2012-imeersukkut kingullermillu Inatsisartut Inatsisaat nr. 18, 3. juni 2015-meersoq aqqutigalugu allanngortinneqarsimasut tunngavigalugit aalajangersarneqarpoq:

Atuuffia

§ 1. Nalunaarut kapisilinniarnermut imartani Kalaallit Nunaata aalisarnikkut oqartussaaffigisaani Nunap Isuata kitaani NAFO-p sumiiffilersuiffiani 1-imi ingerlanneqartumut atuuppoq. Tunngaviusumik killigititamit 40 somilit avataanni aalisarneq inerteqqutaavoq.

Imm. 2. Kalaallit Nunaata Kangiata aalisarfíni kapisilinniarnermi malittarisassat nalunaarummi § 5, § 6, § 7, § 8, aamma § 9-mi taaneqartut atuupput. Tunngaviusumik killigititamit 12 somilit avataani kapisilinniarluni aalisarneq inerteqqutaavoq.

Imm. 3. Nalunaarut aammattaaq kapisilinnik pisinerup tunisinerullu nalunaarutigineqarnerinut kiisalu inuussutissarsiummut atatinnagu kapisilinniarnermi pisat nalunaarutigineqarnerinut atuuppoq.

Nassuaatit

§ 2. Inuussutissarsiutigalugu kapisilinniarneq nalunaarummi matumani paasineqassaaq pisat tamaasa ilaannaasaluunniit tuniniarnissaat siunertaralugu kapisilinniarnerut. Inuussutissarsiutigalugu kapisilinniarissamut akuersisummik allagartallit kisimik kapisilinnik tuniniaasinnaatitaapput.

Imm. 2. Inuussutissarsiummut atatinnagu kapisilinniarneq nalunaarummi matumani paasineqassaaq nammineq atugassanik kapisilinniarnerut.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarissamut akuersisummik allagartaqartunit toqqaannartumik pisineq tigusinerlu.

Imm. 4. Piffissaq aalisarfíusoq nalunaarummi matumani paasineqassaaq piffissatut imaluunniit piffissat ilaattut kapisilinniarsinnaatitaaffittut.

Imm. 5. Pisassat ilaat nalunaarummi matumani paasineqassaaq pisassat tamarmiusut piffissami aalisarfíusumi piffissami aalajangersimasumi inunnilluunniit aalajangersimasunit aalisarneqarsinnaasut imm. 1 aamma 2 takukkit.

Inuussutissarsiutigalugu kapisilinniarnermut piumasagaatit

§ 3. Akuersisummik allagartamik tunineqartut kisimik inuussutissarsiutigalugu kapisilinniarsinnaatitaapput. Inuussutissarsiutigalugu kapisilinniarsinnaanermut allagartat akuersissutit Naalakkersuisunit tunniunneqassapput.

Imm. 2. Allagartat akuersissutit qinnuteqartunut piumasaqaatinik makkuninnga naammassinnittunut tunniussisoqarsinnaavoq:

- 1) Inuaqatigiinnut kalaallinut attuumassuteqavissunut, tak. aalisarneq pillugu Inatsisartut inatsisaanni § 3, imm. 4.
- 2) Qassutinik kapisilinniutinik aamma angallammik kapisilinniummik 12,8 meterit (42 fod) tikillugit tamakkerlugu angissusilimmik nammineq pigisaqartunut.
- 3) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik nalunaaruteqartumut.

Inuussutissarsiutigalugu kapisilinniarnermi piniutit

§ 4. Inuussutissarsiutigalugu kapisilinniarneq qarsorsat qassutillunniit tasillugit 140 mm-inik nigartallit atorlugit taamaallaat ingerlanneqassaaq. Qassutit tissukartittakkat atorneqarsinnaapput, taamaattorli atuinermi ataatsimi amerlanerpaamik uiguleriit 20-kkuutaarlugit.

Imm. 2. Qassutit nigartaat uuttorneqassapput uuttuutit ½ kiilumik oqimaalutserlugu nigartamat ikkunneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-im i piumasaqaat equuutsissavaat.

Imm. 3. Qassutit kapisilinniutit atorneqartut tamarmik piginnittup aqqanik imaluunniit taassuma angallataata normuanik nalunaaqutfersugaassapput. Nalunaaqutsiinermi atorneqartoq imermi allanngujaatsuussaaq.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminut periarfissaat ajornerulertussajunnaarlugit.

Imm. 5. Qassutit tissukartittakkat nalinginnartut nalunaaqutsigaallutillu qulleqassapput

Inuussutissarsiutigalugu kapisilinniarnerup aqunneqarnera

§ 5. Inuussutissarsiutigalugu kapisilinniarneq pisassiissutit aallaavigalugit najukkani kalaalimineerniarfinnut akunnittarfinnullu, neriniartarfinnut, napparsimavinnut, ilinniartut najugaqarfinut pisortallu nerisitsisarfinut allanut tuniniarneqartussanik aalisarnertut ingerlanneqassaaq.

§ 6. Aalisarnermut, tak. § 5, Naalakkersuisut ukiut tamaasa, nunat tamalaat akornanni isumaqatigiissutit aallaavigalugit, Kitaani kapisilittassanik aalajangersaasassapput. Pisassat pisasanut immikkoortiterneqarsinnaapput piffissap ilaani aalisarneqarsinnaasutut agguataarneqarsinnaallutik.

Imm. 2. Naalakkersuisut KNAPK-lu isumasioqatigereerlugu inuussutissarsiutigalugu kapisilinniarnissamut piffissat ilaannut ataasiakkaanut ulloq aallartiffissaq aalajangertassavaa. Piffissat ilaannut ataasiakkaanut ulloq aallartiffissaq kommuninut ataasiakkaanut, KANUKOKA-mut, KNAPK-mut kiisalu nuna tamakkerlugu tusagassiorfiit aqqutigalugit nalunaarutigineqassaaq.

Imm. 3. Inuussutissarsiutigalugu kapisilinniarneq piffissat ilaannut ataasiakkaanut ulloq aallartiffissatut aalajangerneqartoq sioqqullugu aallartinneqassanngilaq aammalu piffissaliussat ilaasa ataasiakkaat naanerisigut unitsinneqarluni imaluunniit pisassat nungunneqarpata.

Imm. 4. Inuussutissarsiutigalugu kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutilugit) kiilunngorlugin taaneqartut, iluanni pisinnaavoq.

Imm. 5. Inuussutissarsiutigalugu kapisilinniarnermit pisat Kalaallit Nunaata avataani taamaallaat pisariortorneqarsinnaapput tuniniarneqarsinnaallutilu Naalakkersuisut akuersissuteqarnerisigut.

§ 7. Kapisilittasiissutit aalajangikkat tamakkerlugin pisarineqarnissaat qanillippat, Naalakkersuisut nalunaarutigissavaat, qaqgu inuussutissarsiutigalugu kapisilinniarneq kiisalu taamatut aalisarnermit pisaniq pisineq aamma tunisineq unissanersoq.

Imm. 2. Tamanna kommuninut ataasiakkaanut, KNAPK-mut KANUKOKA-mullu aammalu nuna tamakkerlugu tusagassiorfuit aqqutigalugit nalunaarutigineqassaaq.

Imm. 3. § 6, imm. 3 naapertorlugu aalisarneq unippat, inuussutissarsiutigalugu kapisilinniarneq sunaluunniit kiisalu aalisarnermit tamatumannga pisineq tunisinerlu inerteqqutaapput.

Inuussutissarsiutigalugu kapisilinniarnermit pisaniq nalunaaruteqartarneq

§ 8. Kapisillit pisarineqartut tamarmik Kalaallit Nunaanni Aalisarnermik Akuersissutinik Nakkutilliisoqarfimmut (KANUAANA) nalunaarutigineqassapput.

Imm. 2. Tunisat imaluunniit akigneqartut amerlassusii "niaquernagit erlaveerlugit" nalunaarutigineqarpata naatsorsueriaaseq 1,11 atorneqassaaq aalisakkat ilivitsunngortillugit naatsorsorneranni.

Imm. 3. Aalisartut inuussutissarsiutigalugu kapisilinniarnissamik akuersissummik allagartamik pillit, toqqaannartumik kalaalimineerniarfinni tunisisartut imaluunniit toqqaannartumik pisisartumut kalaalimineerniarfit avataanni tunisaqartartut kapisilinnik tulaassinitik tamaasa nalunaarutigisassavaat. Nalunaaruteqarnermi kapisillit ataatsikkut tulaanneqartut tamakkerlugin nalunaarutigineqassapput. Pisat pillugit nalunaarutiginninneq nalunaarummi ilanngussaq 1 atorlugu pisassaaq. Pisat pillugit nalunaarutiginninnissaq uunga nassiunneqassaaq: KANUAANA, Postboks 501, 3900 Nuuk, Telefax 34 63 60 imaluunniit e-mail-ikkut uunga gfk@nanoq.gl. Nalunaarutiginninneq kapisilinnik tulaassinerup kinguninngua pisassaaq.

Inuussutissarsiummut atatinnagu kapisilinnik aalisarneq

§ 9. Inuussutissarsiummut atatinnagu pisassiissutit aalajangersarneqartut iluanni kapisilinnik aalisarneq takujuk § 5, danskit naalagaaffianni innuttaassuseqartunit Kalaallit Nunaanni najugaqavissunit ingerlannejassaaq, tak. Aalisarneq pillugu Inatsisartut inatsisaanni § 8, imm. 1. Nunani allani Danmarkiungitsumi innuttaassusillit Kalaallit Nunaanni najugaqavissut ukiullu kingullit marluk ataavartumik Kalaallit Nunaanniissimasut danskisut innuttaassuseqartutut pineqassapput.

Imm. 2. Inuussutissarsiummut atatinnagu kapisilinnik aalisarneq piffissap Naalakkersuisunit aalajangersarneqartup iluinnaani inuussutissarsiutigalugu aalisarneq pisinnaavoq.

Imm. 3. Inuussutissarsiummut atatinnagu kapisilinniarnermi qarsorsat qissattaatillu kisimik atorneqassapput kiisalu qassutit (ataatsit) 2000-inik nigartallit, taakkua tasillugit nigartaat minnerpaamik 140 mm-iusut.

Imm. 4. Qassutit nigartaat uuttorneqassapput aalisarnermik nakkutilliisut uuttuutaata ½ kiilumik oqimalutserlugu nigartamut ikkunneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi piumasaqaat eqortissavaat.

Imm. 5. Qassutit kapisilinniutit atorneqartut tamarmik piginnittup aqqanik imaluunniit taassuma angallataata normuanik nalunaaqutsersugaassapput. Nalunaaqutsiinermi atorneqartoq imermi allanngujaatsuussaaq.

Imm. 6. Silap pissusaata taamaattoqartissinnaappagu qassutit kapisilinniutit akuttunngitsumik

akulikitsumillu qassusiarfigineqartassapput, pisat uumanissaminut periarfissaat ajornerulerussajunnaarlugit.

Inuussutissarsiummut atatinnagu kapisilinnik aalisarnermit pisanik nalunaaruteqartarneq

§ 10. Inuussutissarsiummut atatinnagu kapisilinnik aalisarnermi kapisillit pisarineqartut tamarmik KANUAANA-mut nalunaarutigineqassapput.

Imm. 2. Pisat pillugit nalunaarutiginninneq nalunaarummi ilangussaq 1 atorlugu pisassaaq. Pisat pillugit nalunaarutiginninissaq uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mail-ikkut uunga gfk@nanoq.gl. Pisanik nalunaarutiginninneq qassutinik alakkaareerluni tikinnerit kinguninngua pisassaaq, takujuk § 9 imm. 6.

Pineqaatissiissutit

§ 11. § 2, imm. 1, 2. pkt., § 3, imm. 1, § 4, imm. 1, aamma imm. 3, § 6, imm. 3, 4 aamma 5, § 7, imm. 3, § 8, § 9 aamma § 10-mik unioqqutitsinerit Kalaallit Nunaanni Pinerluttulerinermik Inatsit naapertorlugu akiliisitsinermik kinguneqarsinnaapput. Akiliisitsineq Nunatta Karsianut tutsinneqassaaq.

Imm. 2. Inatsisilerinermik immikkoortut inuttut isigineqarsinnaasut pinerluttulerinermut inatsimmi malittarisassat malillugit imm. 1-imut ilaapput.

Imm. 3. Pinerluttulerinermik inatsimmi arsaarinnittarneq pillugu malittarisassat atuupputtaaq.

Atortuulersitsineq

§ 12. Nalunaarut manna 15. august 2015 atuutilerpoq. Tamatuma peqatigisaanik kapisilinniarneq pillugu Namminersorlutik Oqartussat nalunaarutaat nr. 12, 1. august 2012-imeersoq atorunnaarpooq.

Namminersorlutik Oqartussat, ulloq 13. august 2015

Karl-Kristian Kruse

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut